
■ AGID SVIZZER PER LA MUNTOGNA

Dà 3,6 milliuns per 81 projects en il Grischun

(anr) Las cifras che l'Agid svizzer per la muntogna ha publictà quels dis en ses rapport per 2011 èn imposantas: 59 850 donaturs ha spendì 22,3 milliuns. La gronda part dal els deriva da la Bassa e da las aglomeraziuns. Per sustegnair 576 projects èn 23,6 milliuns francs vegnids impundids. Il Grischun ha survegni l'importo considerabel da 3,6 milliuns per 81 projects. Quai è il segund bler suenter il chantun Bern cun 5,3 milliuns e per 160 projects.

L'activitad da l'Agid svizzer per la muntogna sa basa sin il princip: «Gidar per pudair gidar sasez». Finamira è da meglierar las cundiziuns da lavur per la populaziun da muntogna. I va la finala era per mantegnair la cultura regiunala, tgirar la cuntrada e franar la depopulaziun. – 2011 è stà en l'Europa l'onn dals voluntaris. Tras l'Agid svizzer per la muntogna èn vegnidadas prestadas era l'onn passà pli che 8000 uras da voluntaris. Experts ed expertas da questa organizaziun examineschan adina gratuitamain mintga dumonda per sustegn. Els visitan quels che han dumandà agid en ils lieus sez. Quels experts disponan da grondas experientschas ed invistas e pon uschia giuditgar sch'ins cuntanscha cun in project l'effect giavischè a na.

Divers projects sustegnids en il Grischun

En il Grischun ha per sumeglia era la famiglia purila Gander en Val Stussavgia profità da l'Agid svizzer per la muntogna cun pudair diversifitgar e realisar ses project en favur da l'agroturissem. L'ovra d'agid menziunada ha sustegnì da renovar la veglia stalla che serva ussa sco albiert turistic ed è gia stada fitg tshertgada. In project, sustegnì en favur dal turissem miaivel, ch'è la gronda schanza per la populaziun da muntogna, è stà da far or dal hotel Piz Vizan a Vargistagn (Schons) in «Center da capricorns» cun manaschi d'hotel.

Cun sustegn da l'Agid svizzer per la muntogna pon en tut 11 stizuns restar vinavant en ils vitgs, uschia er a Vignogn, Guarda, Danis-Tavanasa, Versomi, Surrein-Rabius Veulden, Fuldera e Valchava. Qua tras han ins era pudì salvar plazs da lavur en ils vitgs. Suenter avair cuntanschì il final tar la cursa da scarsolas e schlieusas a Mompe Medel, ina fracziun da Mustér, pon ils participants prender in refrestg ed ir a chaud en in stabiliment en furma da container. Vitiers vegn che quest indriz – ch'è bun per la vita dal vitg e dal turissem e vegnì realisà era cun l'agid svizzer – serva gist era sco lieu da sentupada per la populaziun.